



Cylchlythyr Nadolig 2009

Cyfarchion yr Ŵyl. Erbyn diwedd mis Tachwedd eleni, fe gyrhaeddodd Cytûn benllanw cyfnod hynod weithgar a chynhyrchiol. Manteisir ar y cyfle hwn i danlinellu nifer o ddatblygiadau o bwys wrth i offeryn ecwmenaidd Cymru ymdrechu i gyhoeddi'r Efengyl yng nghyswllt byd Cymreig sy'n brysur newid.

Rhydd Cytûn bwyslais sylweddol y dyddiau hyn ar lwyfannu cenhadaeth yr eglwysi ar y cyd mewn cyfres o wyliau cenedlaethol: Eisteddfod Genedlaethol yr Urdd, Sioe Amaethyddol Llanellwedd a'r Eisteddfod Genedlaethol. Eleni, gwelwyd twf sylweddol ym mhrysurddeb pabell yr eglwysi yn Eisteddfod y Bala. Mawr yw diolch Cytûn i'r eglwysi lleol am eu gwaith caled. Rhian Linecar fu'n hyrwyddo'r gwaith hwn. Fel y llynedd, llwyddodd Cytûn i ddod i drefniant â'r Eisteddfod Genedlaethol i ofalu bod mynediad am ddim i'w gael i'r addoliad agoriadol. Diolchir i Sasha Perriam am ofalu bod y cynllun hwn yn gweithio.

Ddiwedd Medi, trefnodd Cytûn wasanaeth coffâd cenedlaethol Ffederasiwn yr Heddlu yn Neuadd Dewi Sant, Caerdydd. Dros gyfnod o ddeuddydd llwyddwyd i gynnig croeso yn fwyaf arbennig i wragedd gweddwon o Ogledd Iwerddon. Fe ddaw'r gwasanaeth hwn i Gymru pob pedair blynedd. Credir i'r achlysur ddwyn bendith.



Ers yr haf, arddelwyd presenoldeb mewn cynadleddau eglwysig gan ymdrechu i gynnig atebolrwydd i'r enwadau. Y mae'r gwaith o ddiwygio safle Cytûn ar y we yn mynd rhagddo a da o beth yw cofnodi bod gwaith y pwyllgor a sefydlwyd i hyrwyddo codi arian ar gyfer cael Beibl Cymraeg

mewn Braille wedi croesi trothwy newydd. Diolchir yn arbennig i aelodau Capel y Priordy yng Nghaerfyrddin a'r Beibl Gymdeithas am eu gwaith da yn hyn o beth. Gellir anfon cyfraniadau at: **Dr Watcyn James (Apêl Beibl Braille Cymraeg) 94 Ffordd Penygarn, Tycroes, Rhydaman, Sir Gâr SA18 3PF.**

Llwyddwyd i roi adroddiad llawn o weithgareddau Cytûn yn y Cyfarfod Blynyddol a gafwyd ganol mis Hydref. Gyda llawenydd, derbyniwyd Eglwys Bresbyteraidd De Corea yng Nghymru yn aelodau. Y mae Cytûn yn llwyddo i weithio oddi fewn i'r gyllideb a gytunwyd. Da hefyd oedd cael cyfle drwy gyfraniad y Canon Bob Fyffe, Ysgrifennydd Cyffredinol Eglwysi Ynghyd Ym Mhrydain ac Iwerddon, i weld sut y mae gwaith Cytûn yn disgyn oddi fewn i batrwm ehangach. Bydd y cydweithio agos hwn yn parhau. Ers cynnal y Cyfarfod Blynyddol mae eglwysi ac enwadau eraill wedi mynegi diddordeb mewn ymuno â Cytûn.

Trwy gydol y misoedd diwethaf hyn, llwyddodd Cytûn i gyflawni gwaith ecwmenaidd arferol o hyrwyddo cytundebau lleol ac ymweld â chynghorau ecwmenaidd lleol. Cyrhaeddwyd penllanw bendithiol drwy ymweld â Cytunau lleol y Gogledd Ddwyrain ym Mwcle. Erbyn hyn hefyd, cafwyd sêl bendith y Comisiwn Elusennau i newidiadau cyfansoddiadol sy'n gwneud Cytûn yn fwy atebol i gyrff ecwmenaidd lleol.

Rydym yn parhau i gydweithio'n agos â Chomisiwn yr Eglwysi Cyfamodol a Chyngor yr Eglwysi Rhyddion. Yn hyn o beth, cwblhawyd gwaith sylweddol ynghylch cynrychiolaeth CYSAGau. Trefnwyd cyfarfod allweddol gydag arweinyddion eglwysi'r Cyfamod.

Parhaodd Swyddog Polisi Cytûn i gysylltu'n rheolaidd â'r eglwysi ynghylch materion yn ymwneud â'r Cynulliad. Cadwyd mewn cysylltiad rheolaidd â swyddogion y Cynulliad yn fwyaf arbennig ynghylch sefyllfaoedd a all godi parthed y fflw moch. Bellach, cyhoeddwyd argymhellion Confensiwn Cymru Gyfan o dan gadeiryddiaeth Syr Emyr Jones Parry. Cafwyd ymatebion cadarnhaol gan nifer o eglwysi. Cefais y fraint o wasanaethu ar y Confensiwn wedi i mi gael fy enwebu gan Fwrdd Cytûn. Rydwyf yn fwy na pharod i drafod cynnwys yr adroddiad mewn cyfarfodydd eglwysig.

Ymdrechwyd i gefnogi gwaith yr eglwysi mewn sefyllfaoedd cyhoeddus lle y mae Cristnogion bellach yn cael eu hunain yn gwasanaethu mewn cyswllt aml-ffydd ac aml-ddiwylliant. Rhoddwyd cymorth i gaplaniaethau mewn prifysgolion wrth ffurfio cyfansoddiadau a phartneriaethau cyfreithiol. Ymdrechwyd yn llwyddiannus hyd yma, drwy waith sawl un, i ofalu nad yw ymddiriedolaethau iechyd yn cael eu perswadio gan seciwleriaid i orfodi'r eglwysi i dalu am gaplaniaethau mewn ysbytai. Hefyd, defnyddiodd Cytûn y cysylltiadau a'r sgiliau a gafwyd ynghylch materion yn ymwneud â mewnfudo i ofalu bod merch o Batagonia yn cael caniatâd i ymweld â'i chwaer yng Ngwynedd.

Fel corff Cristnogol, ni all Cytûn hyrwyddo addoliad aml-ffydd ond llwyddwyd i ymateb yn gadarnhaol i ysgogiad gan eglwysi i ddwyn cymunedau ffydd Cymru at ei gilydd ac i drefnu cyfarfodydd cenedlaethol, rhanbarthol a lleol. Dathlwyd y cyd-ymwneud hwn yn y cinio o eiddo Cyngor Mwslimiaid Cymru wrth iddyn nhw ffarwelio â Rhodri Morgan fel Prif Weinidog Cymru. Cynhaliwyd Eisteddfod Rhyng-ffydd llwyddiannus ddechrau Rhagfyr. Yn wyneb ymweliad yr "English Defence League" ag Abertawe gwelwyd yn dda i gefnogi safiad Crynwyr y ddinas. Yn eu dull grymus arferol, fe safodd y Crynwyr am awr gyfan mewn protest dawel gan wahodd Cristnogion y ddinas ac eraill i ymuno â nhw.



Bydd yr wylnos a gynhaliwyd ar strydoedd Casnewydd y nos Wener ganlynol yn aros yn hir yn y cof. Na'i byth anghofio'r funud honno, mewn noswyl a gasglodd ynghyd lluo o Gristnogion, Mwslimiaid, Iddewon ac eraill o argyhoeddiad i wrthsefyll yn gadarn yn erbyn casineb crefyddol, pryd y cododd pawb faneri bychan y ddraig goch gyda'i gilydd. Nid ar chwarae bach y mae dwyn pethau fel hyn i fod. Y mae'n rhaid dathlu gwaith rhagorol ac allweddol Tŷ'r Gymuned o eiddo Eglwys Bresbyteraidd Cymru yn nhermau adeiladu pontydd rhwng pobl yng Nghasnewydd.

Gofynnir i gyrff ecwmenaidd lleol nodi un dyddiad pwysig. **Dydd Gwener 26 Chwefror 2010 am 11.30 y bore cynhelir cyfarfod cyntaf Grŵp Galluogi cyntaf Cytûn yng Ngholeg y Bedyddwyr, Caerdydd o dan ein cyfansoddiad newydd.** Y mae croeso i gyrff ecwmenaidd lleol anfon cynrychiolydd. Os ydych am anfon cynrychiolydd, gofynnir i chwi gysylltu â Sasha Perriam rhag blaen os gwelwch yn dda.

Nadolig Llawen a Blwyddyn Newydd Dda.

Pob Bendith,

Y Parchedig Aled Edwards OBE
Prif Weithredwr Cytûn

Cytûn: Eglwysi Ynghyd yng Nghymru, 58 Richmond Road, Caerdydd CF24 3UR 029 2046 4375 post@cytun.org.uk Mae Cytûn yn gwmni cofrestredig yng Nghymru a Lloegr | Rhif: 5853982 | Enw cofrestredig: "Cytûn: Eglwysi Ynghyd yng Nghymru/Churches Together in Wales Limited" | Mae Cytûn yn elusen gofrestrdig | Rhif: 1117071